



Ustrajnost u vjeri – put spasa (Medina)

Hatib: dr. Husejn ibn Abdulaziz Alu Šejh

22. zul-hidže 1443. po Hidžri / 22. juli 2022.

Hvala Allahu, Velikom i Uzvišenom. Svjedočim da nema boga osim Allaha, jedinog, Koji nema druga na budućem i ovom svijetu, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik i odabrani vjerovjesnik, Allahu moj smiluj se, spasi i blagoslovi ga, i njegovu bogobojaznu porodicu i ashabe.

O muslimani, najviša intencija svih ibadeta jeste veličanje Stvoritelja, potpuna poniznost pred Njim i ostvarenje potpune ljubavi prema Njemu, kako bi rob, na taj način, bio na najvećem mogućem stepenu tevhida – jednoboštva i praktično primijenio u svom životu riječi Allaha, džellešanuhu: "Reci: 'Klanjanje moje, i obredi moji, i život moj, i smrt moja doista su posvećeni Allahu, Gospodaru svjetova, Koji nema saučesnika; to mi je narađeno i ja sam prvi musliman.'" (El-En'am, 162–163)

Čovjekovo obožavanje Allaha, džellešanuhu, trajna je obaveza, koja se nikada ne prekida i ne prolazi, osim smrću i napuštanjem ovoga svijeta. Uzvišeni kaže: "... i sve dok si živ, Gospodaru svome se klanjaj!" (El-Hidžr, 99)

Allah je Svojim robovima u životu na ovom svijetu strogo naredio da ustraju u Njegovom obožavanju i da se čvrsto drže puta razboritosti i upute, i da svoje duše udalje od šejtanskih puteva i svega onoga što će ih uniziti i upropastiti.

Poštovani vjernici, neka vaš životni slogan, budu riječi Uzvišenog: "Ti idi Pravim putem, kao što ti je naređeno, i nek tako postupe i vjernici koji su uz tebe, i obijesni ne budite, jer On dobro vidi ono što radite" (Hud, 112), i neka pred tvojim očima uvijek bude Poslanikova, sallallahu alejhi ve sellem, preporuka: "Reci: 'Vjerujem u Allaha', a zatim ustraj u tome."

Poštovani vjernici, pokušajte u izvršavanju farzova pronaći inspiraciju za povećanje dobra i činjenje dobrih djela, i neprobojni bedem i sigurnu branu koji će vas čuvati





od grijeha i loših postupaka. Uzvišeni kaže: "Do Allaha neće doprijeti meso njihovo i krv njihova, ali će Mu stići iskreno učinjena dobra djela vaša." (El-Hadždž, 37)

Budite svjesni Allaha u svim segmentima svoga života, pokoravajte Mu se i odazovite se Njegovim naredbama. Onaj ko želi vječnu sreću i potpuni uspjeh, neka ustraje u bogobojažnosti i neka svoju dušu obaveže time, u tajnosti i javnosti, i u svim situacijama. Naš Uzvišeni Gospodar kaže: "Oni koji govore: 'Naš Gospodar je Allah!' – i istraju na Pravome putu, neka se ničega ne boje i ni za čim neka ne tuguju! Oni će stanovnici Dženneta biti, i u njemu će vječno boraviti, i to će im biti nagrada za ono što su radili." (El-Ahkaf, 13–14)

O vjernici, borite se sa svojom dušom, i molite Allaha da vas učvrsti na putu pokornosti i upute, tražite od Allaha pomoć, donesite iskrenu i čvrstu odluku da ćete se pridržavati propisa islama, i svoje srce ispuniti strahom od Allaha, sjećajte se uvijek prolaznosti i bezvrijednosti ovoga svijeta i da je ahiret trajan i vječan, odgajajte svoju dušu u činjenju lijepih stvari i dobrih djela i udaljite je od uzroka Allahove srdžbe. Allah, džellešanuhu, kaže: "One koji se budu zbog Nas borili Mi ćemo, sigurno, putevima koji Nama vode uputiti; a Allah je, zaista, na strani onih koji dobra djela čine!" (El-Ankebut, 69)

Sjećaj se, srcem i tijelom, Poslanikove, sallallahu alejhi ve sellem, veličanstvene preporuke: "Svi iz mog ummeta ući će u Džennet, osim onih koji to odbiju!" Neko upita: "Allahov Poslaniče, a ko je taj ko bi odbio da uđe u Džennet?", a Poslanik odgovori: "Ko mi se bude pokoravo, ući će u Džennet, a ko mi se suprotstavi, odbio je." (Buhari)

Držite se čvrsto svoje vjere, spasit ćete se, budite pokorni svome Gospodaru, postići ćete vječnu sreću. Uzvišeni kaže: "Vjernici će postići ono što žele." (El-Mu'minun, 1)

O vjernici, čovjek u životu na ovom svijetu teži svakom dobru i spasu od svakog zla, a da bi to postigao, obavezan je slijediti zapovijest svog Uzvišenog Stvoritelja, Koji





kaže: "O vjernici, budite strpljivi i izdržljivi, na granicama bdijte i Allaha se bojte, da biste postigli ono što želite!" (Ali Imran, 200)

Ribāt – bdijenje na granicama sveobuhvatni je naziv za ustrajnost u dobru i pokornosti i natjecanje u činjenju dobrih djela, i zato, vežite svoju dušu za pokornost Allahu i udaljite je od onoga što je On zabranio. Uzvišeni kaže: "O vjernici, molitvu obavljajte i Gospodaru svome se klanjajte, i dobra djela činite da biste postigli ono što želite." (El-Hadždž, 77)

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha, Uzvišenog, tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

